

四庫全書

集部

欽定四庫全書

集部

止堂集卷十三

詳校官庶吉士臣謝恭銘

主事臣呂雲棟覆勘

總校官編修臣朱鈐

校對官學錄臣謝登雋

騰錄監生臣汪國均

欽定四庫全書

止堂集卷十三

宋

彭龜年 撰

啟

答柳州吳守啟

疏恩易地乃落衡山之南開府承流又作殊方之喜教
不易俗人易以孚恭惟某官抗志高明受材雋偉人物
為當世之最議論居諸子之先校中祕書聲問籍籍入

御史府步武駸駸爭予所不予盤之中堪嗟朝市之路
隘得此州又在嶺之上卻思父老之情親想應田里之
安不待教條之出竚膺褒詔趣覲明廷某久闊晤言方
深瞻想見王言如絲而出喜不後于他人拜使君治蔭
之勤意甚慚于記史其為報謝未易形言

通宜春徐知縣啟

去父母之邦真成漫仕宰山水之縣乃有令君豈不畏
簞楚之徒勞以嘗侍几杖而甚喜去違滋久方切候鳧

之心眷予特深不忘烹鯉之惠以至于問勞之語每見之故舊之書飄然而來恃此不恐恭惟某官行能高妙議論通明尋常瀆豈容吞舟之魚九萬里斯展垂天之翼乃小試惠綏于巖邑以養成經濟之壯懷當路見之無異東湖之孺子一朝掀舉必興太末之名家某才拙無堪志迂寡偶誤玷明經之舉遂為游徼之官需次六年始能問戍相望累驛行遂趨風輒修駢儷之文先寓毫分之敬得事君子固將思濟斯民敢有他心徒使惠

歸一尉

迎臨江葉守啟

需次近畿輒臨偏疊顧賢者澤民之志易地皆然而聖
主念遠之心一見決矣人隨所用而重公豈遽輕此行
雖君子欲無疾其驅然小人嘆其來何暮恭惟某官受
材庸敏毓德溫醇大振家聲見石林先生之有後小脫
囊穎如海沂別駕之可歌何自為州聊以重國地無大
小之異事關根本則同如漢以二千石治庶民實為親

切得結輩十數公置天下藉以撫綏豈惟布德意于斯
人抑亦啟遠圖于今日但恐開藩之未久定應乘駟以
還歸某惕然念咎于里中幸甚占籍于麾下已從道上
望大守之行春將飲田間誇新尹而作社

上袁州汪守啟

乙未
春

以祿代耕甘為奔走之吏及瓜請戍獲從慈惠之師夫
豈偶然殆有相爾當葦車之就國適出敝郊擁篲箠以
趨風以償數願惟名分之際嚴而有節故啟問之禮禁

不得修至于馳慕之深曾無食息之間慙非孺子深恐
後期幸與斯民得依先覺恭惟某官秉義醇壹蓄德雄
剛廉潔自持如出清水于萬壑功名孰禦當翼疾風于
九閭夫何歛天朝之羽儀為王國之蕃翰以望重固宜
于寄遠而才難尤在于水流茵憑之來冕旒亦喜憂顧
寬于千里之外惠澤暢于九重之前白紵連襦爭出秀
江之險默黎羣誦始識春臺之溫于是回昌黎難繼之
政聲自此完龍溪未盡之功業豈惟石刻列父子以俱

榮當啟金甌見姓名之特起某跡寒與寡才短用疎嗜
好不與俗侔幾為衆笑樸魯未諳世故安免人非況復
使之宦遊必不逃夫吏議雖欲安甘旨之奉何以無酸
寒之憂如履垂堂幸依厦屋民皆感德固已負于鉏鉤
吏亦可勞或少寬于簞楚

迎袁州李守啟

乙未
夏

誕揚明詔特起舊臣自辭烏府而來皆期大用忽擁虎
符而出以惠遠方惟賢哲之一心視內外無異體盡宣

王化如在本朝恭惟某官直氣塞天地之間貴名如日月之起志意慷慨真有前輩之風議通論明盡識當世之務暫撫綏于蠻獠繼饋餉于邊屯皆枉壯圖甚孚公論遂乘一節之召入居三院之榮當驪龍處深淵之中莫撓其怒而鼯鼠伏神丘之下竊弄其機非藉公言孰振士氣忽焉去國何以正邦屬九重以四方為心擇大賢任千里之寄維宜春之古郡甲江右之列城珥筆之風猶未銷于舊俗懷鉛之士終莫抗于他都必復得如

韓文公之才庶幾可跨漢良吏之治暫紆紫綬欽大惠而施一州即下白麻佐天子而令四海某得一職百僚之底當歷年積弊之餘惟近民故易以擾民求禦盜而適以滋盜朞月于此中心惻然欲寡過而未能方內省于不疚竊仰二天之庇實殫此心輒繼兩月之歌以為尺牘

迎袁州守啟

丙申
春

制出右掖恩頒左符方郡守之數更不知為政忽賢者

之鼎至皆喜得人百吏聞風一意聽命恭惟某官才周世務識照事機立志不後于古人所學皆傳于先世舉相國中興之業莫比勤勞數本朝名臣之家無此忠義臧孫有後孰不謂宜周公拜前當有繼者何望重尚煩于寄遠以才難政在于承流況宜春之古都為江右之劇地民甚貧而賦必豫出財愈竭而用不可支故今日聞我公之來如向者望長君之至雖夏侯兄弟之政不復能使二難之并然南陽父母之賢皆云可以一舉而

得凡此邦之利病當即日而罷行第恐鋒車不容暖席
某才窮五技官尾百僚未能免酸寒之憂何以為甘旨
之養至于曠職尤切關心如履垂堂之危偶近厦屋之
庇民皆感德固已帶于鉏鉤吏亦可勞或少寬于箠楚

上袁州張守啟

戊戌夏

不材漫仕幸依大府之仁藉庇終更敢起故鄉之念顧
圖報之心用酬萬一而丐歸之請已及再三自當去就
難處之時可不反覆極言其故豈得已不已而冒瀆尊

之罪蓋可言不言則負知己之恩宜賤子之具陳幸閣
下之垂聽伏念某身勤事左意廣才疎未能嗜世俗之
酸鹹自分田野無以奉親庭之甘旨妄意科名偶得一
官來遊大國迄今三載所事數公靳塞譴責而未能雖
有建明而莫可自登鈴閣即蒙特達之知凡有贅言必
荷委曲而受不堪器使且辱甄收未知結草之効忠忽
已及瓜而受代身雖離于職業心甚切于門牆敢思故
國之似人遂若小民之懷土深惟孤植早失過庭之嚴

獨侍偏親久重倚門之望比聞安問必詰歸期雖無君子所去之三已犯天下大戒之二況人情不美其反也寧免爭席之疑且餽問鼎來不知者必有為肉之謗豈小嫌而遑恤亦此心之未安自非高明孰可鑒照恭惟某官溫恭逮下慈惠愛人充此仁心無一物之不體極其功用運天下而有餘顧在冗散之中最荷眷知之厚凡申懇款必辱聽從輒控此情仰祈終惠何必懷此都也敢言賈誼之言雖然豈舍王哉當學孟子之學

謝袁州張守啟

戊戌秋

薄宦多奇偶依大庇薦書再上竇出異知無以堪承惟
深悚懼伏念某乏冲和之器質無廣大之胸襟狂直之
言發必忤物狷介之行大似絕人皆由氣質之偏幾作
生平之累豈堪遊宦何以奉甘旨之歡雖落冗僚安敢
起酸寒之歎得事約束固已幸矣屢加薦論夫豈偶然
載攷前聞實為希遇如東之用不止于司馬故狄公再
薦于唐朝若韓信才真可以將軍故蕭相數言于漢祖

是皆非尋常備數之舉所以待超卓不羣之賢詎可非
才使當此選一顧增三倍之價人固已疑兩薦多溢美
之言誰能不感雖嘗志古人之學亦嘗聞長者之譚政
以識趣之不明莫知所主未免邪正之交勝何以自修
色厲內在則固不敢為外粹中剛則安能盡信辱採過
情之聞列為借譽之辭彼人言之謂何願自揣亦愧甚
恭惟某官仁無一物之不體明照萬事而無遺理劇撥
繁視天下若不足治博詢下問于人言無所不從遂令

狂妄之人容在使令之列不獨優其慙直又重借以吹
噓自幸此生有是知己某敢不勤其未學收此放心有
辱門牆安用漆身之報誓修德業以酬青眼之知

上吉州太守啟

辛丑
春

貳令巖封慙無稱塞庇身大府得所稟承顧不肖冒為
此來在今日若有幸會踉蹌拜賜俯偃効官伏念某材
技無他氣稟甚下習俗熏染之病已痼學術揩磨之功
不深中無所存動輒有過得一官于芥藻文詞之末竊

寸祿于簞楚塵埃之間位雖近民道不及物每見近世
寡過之士間毀節于宦遊常恐至愚極陋之人或負慙
于長者屏居閑處乃當其分承事大邑則非所宜寧以
位偪之為嫌蓋憂責重而難任使之趨事雖云奔走出
入而奚辭與其擾民豈若拜起送迎之無過欲處此而
盡道敢率爾而曰能儻不得大賢為之依歸何以使後
生知所循守茲蓋伏遇某官任古侯伯之寄委有民父
母之慈祥與屬吏委曲之言皆仁心惻怛之意謂縣官

取財之道固亦有經而邑隸斂怨于民反以譟郡方當
凶歲賑恤之不給豈容黠胥掊刻以自豐俾之改轍而
更圖是以弛囚而示指遂使賤屬得布宣寬大之訓詞
致令編氓皆仰望蠲除之號令某敢不敬佩教戒誓償
眷知肯綮諛詞徒効世俗事大之禮苟有愚見當自此
日悉意以言希寬犯分之誅庶展報德之念過此以往
不知所裁

上吉州向倅啟

辛丑
春

拜題與于便道嘗慰夙心竊大廈之餘陰偶隨屬吏念
一時教誨之語歷再歲往來于懷趨參無期惆悵自恨
忽聞分刺少伸騏驥之才獨後衆人仰致燕雀之賀逮
此旬日惕然一心因請戍之有期敬列狀而自訟恭惟
某官氣勁直而不撓才酬酢而有餘自文簡累世于今
見此英偉數先正大臣之後多躋顯榮未應郡丞猶屈
賢者官固無小況二千石之同流道若可行則十萬戶
之蒙福斯人久屬意于此君子亦隨時應之治功方來

相業茲始某酸寒下士苦窳凡才一官償燈火之勤三載困塵埃之辱偶占數清江之上得問學薌林之門于是竊聞前輩之風規每恨未盡故家之文物識公幸矣足以為終身之榮非天相之何以託今日之庇

上憲使啓

偶紆黃綬慙無任職之才竊仰繡衣喜有庇身之所趨風雖舊為隸則新每不敢以訊問寒溫之書仰瀆記室自此始有遵承約束之地故達賤名惟負率爾之慙益

作赧然之色伏念某孤志不侔于俗百拙無庸于時未能鑿方而規圓是宜進寸而退尺得効官于一邑凡需次者六年深欲奉甘旨之歡恐未脫酸寒之累至所職掌況無紀綱以近民故易以擾民求去盜而適以為盜名為教閱徒應虛文但事奔馳以供私役當習俗剽悍之未化有山川險阻之可依未免弄兵安能禦侮乃泣以謬庸之吏豈免無療曠之憂自顧此行何恃不恐茲者伏遇某官道不絕物志在濟時誕布寬恩不憚驅馳

之苦能令歉歲亦無攘奪之風非惟稱部使者嚴重之名蓋不負聖天子臨遣之意豈期疎遠得在使令某敢不恪意奉公修身報上愛人利物誓殫一日之長藏垢匿瑕敢恃二天之庇

上江倉漕啟

伏以歲惡及饑官無委積民貧待哺地阻轉輸偶聞鄰邑之可依敢以有司而不告竊以社倉之制本蓄之村曠近世以來多斂之州郡每當給散之時倍有將運之

費然河內乏食梁王猶盡移粟之心晉國阻飢羸氏亦有泛舟之役蓋方捄百姓之不暇豈復以異地而為疑重念高安之黎民悉居錦水之窮處自辛卯而後率三歲而一旱故挈境之民幾十室而九空一或值于凶年皆仰給于公上嘗大計其粟至費四萬餘斛之多然遠取之州乃歷三十六陂之險既以遡洄之不易復當急漲之可虞維萬載之為都與二邑而錯壤儲國甚富至于陳陳乘流而來不俟信信自可推盈而捄之豈宜舍

易而就難況令甲有移那之文而仁人柄補助之政可
懼煩瀆而不控陳恭惟某官學問不為空言器識足了
大事平生有致君之念未究毫分所至以愛民為先此
亦梗槩不煩矯節能解倒垂某奉檄拯荒畢力無術幸
逢大使無越人視秦之心僭以尺書希孟子發棠之念
仰祈矜恤俯慰凋羸庶令屬邑之微官能布使臣之大
惠

上留帥丘漕啟

幾月不雨亢陽為災惟江西卑薄之鄉豈堪此頻歲之
歉而斯民生死之命乃決于數日之間為國而憂非公
孰望竊惟凶年拯拯之術嘗聞古人講貫之詳十二政
創見于太平之書數百條備著于常平之法觀其惻怛
軫卹之意與夫曲折周防之文得人舉之有此足矣惟
是今日之事頗視昔者而非細數十年之中凡遭旱潦
者至于七八熟察一路之郡號有蓄積者僅留錙銖河
東之民已不可移宣曲之粟殆亦告竭何異廢痼之初

起又嬰寒暑之交侵氣既不完藥終難用然而仁人愛物常圖之未已甚之先天下事機豈至于不可為而止間多補助之計亦有豫備之謀使既雨則民物蒙休而或旱則内外有恃咸歸盛德以惠遺黎恭惟某官員宇宙魁竒之名稟乾坤溫潤之氣將天子之指欲推之鰥寡孤獨之微為若人而謀不啻如父母兄弟之切遇有歲凶之事尚來下問之勤某眇焉無庸幸甚受察偶得斂尺版趨拜于下蔑所建明輒敢援一方利病之言少

佐施設

迎李泉使啟

擢從輔郡出擁軺封自九府圖法之傳至今大敝故一
札細書之出藉公非輕觀其遲遠業而為此除可以見
上意之有所在輒敢臆度其說而以敷陳于前嘗攷三
幣之置官蓋從中古至總數路而置使則由本朝然昔
者兼之他司而嘗收奇羨之功于近歲分為兩臺而猶
負采鑄之課得非天地之藏有限取之已多不曰國家

之用無窮責之益亟故漬鐵以取溶抑已巧矣雖更錢
以助國猶未裕如非有變博之才孰識變通之道恭惟
某官文出胸中之渾厚學非紙上之拘攣視天下事無
煩簡劇易之不周置諸公間以獻納論思而甚允嘗締
班于九寺旋分節于三官人皆惜設施之未充士已知
經畫之已立然而勢不窮則不變利有盈則有虛錢不
憂乎鑄之少而憂夫泄之多銅不貴乎采之衆而貴夫
用之狹此固高明之深察諒非世俗之所知某荒僻謏

聞迂疎凡質學徒泥古而背時趣行欲徇世而與心違
自宜揣分以安貧乃復為養而貳令屬以此邑嘗置治
官伏自省員以來使之督課初乏兼人之智可備曠僚
偶究觀其始終乃竊聞其利病幸承要束輒敢肆言不
得即賀而以書已為非禮又復出意而論事真可為狂

賀江西趙鹽臺啟

誕布絲綸趣頒英蕩諸道置使號天子之外臺一時掄
才必海內之人傑久傾羣聽欣得我公恭惟某官議論

該明行能高妙進官早達赫赫乎名之隨風遇事無難
恢恢乎刃有餘地當曳履星辰之表乃持麾江湖之間
竊惟本朝以來最重監司之寄然轉運刑獄各列一職
惟常平茶鹽兼總二權自熙寧始創此司在江右尤為
劇任蓋今之大農方且藉山海之利而前日羣寇因此
貽廟堂之憂或者疑漏網之不修而未知有覆轍之可
戒雖金穰之歲可免他虞然火耕之民本無常產豈不
資補助之德使之忘俯仰之憂惟于優游閒暇之中始

息奸宄寇攘之念此朝廷所恃為一方之託而父老亦
深喜大賢之來以次用之故位王人諸侯之上又有大
者將舉明王三代之隆某眇焉宦遊四方之初幸甚屬
吏一人之數竊聞弭節之已久屬以詰封而未還不得
即賀而以書已為不足儻責後時而廢禮何以自文

止堂集卷十三

欽定四庫全書

止堂集卷十四

宋 彭龜年 撰

啟

賀江西錢漕啟

明廷疏寵延閣陞班賞當其功人為之喜某竊謂君子
不以非分之受為義吾人貴乎不妄以予為公惟受之
以義故不敢忘皮冠之招惟予之以公故不敢徇繁纓

之請方聖天子申薦賞之令而部使者策將漕之勲名
視實而不浮位因人而愈重恭惟某官以有用之學發
名世之材入侍禁廬已罄論思獻納之益出總外計洞
知本末源流之歸今天下之利盡取以無餘而大農之
官猶以為不足當國家暇閒而若此則軍旅調發且柰
何屬前日羣竊之緩誅徵諸道勁兵而皆聚孰出木牛
之智少紓汗馬之勞佐軍而常操贏資卒藉劉士安之
術給餉而不絕糧道莫償蕭相國之功果聞異數之亟

來徑陟清資而益峻以盜賊所傷殘之地值朝廷加寬
大之恩蠲租賦以予民招流亡而復業固明君屬望之
深者必大賢加意以圖之某敬為斯民慶此實惠盡宣
德意既無遠之不通嗣聽褒嘉將繼茲而又賀

賀江西趙漕啟

祇奉細書出將隆指諸道置使所以舉天下之大綱九
重掄才必以委當代之人傑舉國相屬非公其誰竊以
本朝自創外臺以來首以轉漕為重豈獨權財穀于公

上吏不得功亦恐紊賦斂之經常民無所措乃或者不
推其本意居是官必浚其利源如向來軍旅之輸多一
時權宜之制云何月椿之目至今尚存遂使江右之民
其生益削既朝廷征取者無藝故州縣因緣而為姦能
趨辨者皆謂之才有遠慮者莫適為計勢既窮矣後將
奈何必得大賢以起斯弊恭惟某官學窮根柢德茂本
支嘗對大廷以六經為諸儒之倡謂持此道舉明主于
三代之隆向自著庭出方便郡復將餉輓之節甚鬱經

濟之懷然當俗吏以苛急治財而得賢者柄取予于公
人知趨嚮遂令義利較然民嘗困窮治決安危如此以
今日施為之梗槩即異時輔相之規模某竊以蕪楚之
官窮居英蕩之下行服條教如親見于古人敢飾諛詞
以誑言于執事

賀江西李漕啟

誕布綸言就頒蕩節躋榮延閣豈徒示天下之美名增
重計臣所以踵皇華之故事軺車至止屬部交觀恭惟

某官才足經綸學有根柢一時文采重新西蜀之山川
百世風流復見大蘇之父子嘗舉列聖之鉅典以為長
編之一書視魏相奏漢家之便宜惜乎未盡笑孫樵讀
開元之離報杳不可知絜此規模獨出今古殫其心志
以報國家雖衣綳之出甚榮而畫錦之榮可樂不忘修
纂遂克奏陳皆擬簪筆綴甘泉之班乃復持節按勾吳
之境惟時使事之繁劇莫若漕臺之轉輸自兵與農分
為兩途而國與民幾于交病三十鍾而致一石其費謂

何五千服之賦中邦半麋于此非得道術通明之士莫
求上下充羨之方當有奇謀不愧流馬木牛之運佇開
遠業遂為郊麟翳鳳之遊某生於慙愚出於僻左承師
問道本無尺寸之長應舉覓官偶出權衡之下嘗東退
朝之隙得償進謁之心自去門牆寢疎啟問欣聞將命
已遂觀風幸儕奔走之隸人得受約束於下執輒修尺
牘庶少紓履燕之情尚冀小材或可從相馬之計

賀江西丘漕啟

恭審詔自便藩使以隆指君臣道合初不俟臨遺之煩
遠近意傾固已切諮詢之望然惠有一施歛之異則人
不無去留之私忽聞載馳方覺增喜竊以自禹任土而
荊陽之賦最下繇唐至今而東南之利遂窮張文定當
天下安集之時始能出水場賦錢之橫王文正於太平
全盛之日固已憂朝廷權利之深近攷數十年征歛之
科豈止三四疇昔之取而况水旱之災幾於數矣公
私之積大率枵然無異哀病之人重纓寒暑之變惟國

家固以此地為根本安得不憂輟賢能以振外臺之紀
綱可見此意恭惟某官學極精微而有用行非崖異而
能高文衮衮如萬斛之泉與古爭列才恢恢有遊刃之
地遇事不留雖晉用之遲回而培遠之深厚一陪右府
幾微之論屢分左符鎮撫之勞理效輒聞知會獨異謂
遊江而上得兼知直差易耳故倣漢之制選所表以次
用之不惜一世經綸之才以重十州漕輓之寄惟計臣
自當識本末源流之所在非良弼不能明弛張取舍之

大機幸公之來乃國之福某學無自得才本不長繇進士而得官已踰一紀奉偏親而竊祿偶落旁州方治檄抹荒而還適乘軺將令而至遂偕屬吏同拜下風儻得奉條教而言歸豈不甚幸又復出意見而論事直可謂狂

賀江西尤漕啟

夙擁使華遠將帝指方天下以治財為急其術已窮以儒者而經賦其間此意可見民得所託國以不輕竊惟

大江之西偏實為今日之外府月椿之輸殆七百萬大半皆無名之征中興以來輸五十年幾倍於昔者之賦名為和買而責以折納既用差法而復劇傭錢茶有稅而又歛其租酒盡之而或誅其直至詳經制之目尚持徐陌之籌此皆公取之可稱猶有旁緣而莫攷顧張弓安可以不弛而漏卮每苦其難盈不有仁人孰識大體恭惟某官博取百家而不雜獨立一世而能和發為文章復還三代之淳古措諸事業無非六籍之精微自結

睿聖之知亟升中祕之地以志大不輕于地取故才高
寧屈于拊循旋被絲綸出持英蕩以勞來還定之政固
江東王氣之神於倥偬不給之中增廬阜文風之勝觀
其施設之不苟可知經濟之有餘尚屈此行皆以為枉
然而利有盈則有縮勞不極則不更由後視前取之既
多自今圖往安可不亟于是培國家之相祗寧不在公
行且作朝廷之羽儀豈久處此某氣稟甚下材技無他
幼矜芥藻之詞以覓官壯持簿書之智而竊祿每慙數

誤莫究昨非久仰指南之車無異必東之水偶負丞于
友邑乃受察於隸人不得即賀而以書神如馳馬又復
出意而論事癡若拊驂

謝宰執啟

遠方隨牒久懷就養之私真館奉祠忽遂由衷之請雖
天地造化不遺于一物而斗筭局莫堪于大恩詞則
有窮感無以狀竊以介之推不忍一言于晉寧與親而
俱逃陳仲子不義萬鍾于齊乃離母而獨處然當世不

以之推為不孝而君子至謂仲子為非廉蓋義不當就
則飲菽而亦歡情其可居則捧檄而為善欲識人子何
以為養必知聖門所謂不違如某者行落落而與世乖
學拘拘而求古是自為士已懷四海之慮不敢作無用
之言及居官而効一日之長未嘗為苟免之計惟念親
年及耄子職非耕誥盜四封屢歎杖杜征夫之遠貳令
一邑尤懷北山從事之勞每當出身徇節之時必有臨
深登高之懼屬幸改秩當更字民豈不知積資循進之

足貪誠恐失先意承志之可樂故申將母之諭以希錫
類之仁國爾忘家公爾忘私事上者固當如此忠移于
君順移于長觀人或是得之敢意大鈞亦軫微類恭
惟某官貴尊三事和育羣生德盛自發于威儀功深不
露其神迹知愛其親而達之天下不被其澤如納之溝
中切揣甄陶固能益子華五秉之粟許參詞館益已察
曾子三釜之心某敢不退事其親自竭其力無從倒戟
空有翳桑遺肉之懷安敢爭車少替潁谷請羹之念從

今養志之日無非報功之年

再謝宰執啟

苟祿養親未能隨牒因心錫類又許奉祠雖播物之無私若拜恩之獨厚莫任造化有覲面顏伏念某逮齠齔而已孤長髮膚于其母去賈區而使學其教甚勤惟子職之非耕所養或闕適當壯歲偶得一官遊宦旁州僅免尸饔之歎小出數日尚闕啜指之憂兢兢如形影之相依惴惴懼旨甘之不繼惟古者八十舍從政之子而

近時稠疊推優老之恩未免並緣以致懇請薦容冗食
仰事慈顏俾於一喜一懼之年有以自老不待再仕再
化之後而得此心可謂倖邀敢忘攸自茲蓋伏遇某官
計安天下澤潤生民自寅亮調燮之中發正直平康之
治欲奏天子得歡心以事其親遂使匹夫無常職以食
于食某敢不敬竭饘醢之力以當香火之緣衣懷趙孟
遺母之心無以報德雖在李密養劉之日不敢忘君

謝張尚書啟

微官脫選今以為難小已辰逢人知獨異施異者未易
語報感深者不容以言試具陳之則可睹已伏念某身
勤而事左意廣而才疎每讀書必欲求志士仁人之心
自為士已不屈王公大人之下顧如愚戇褊急之累在
性質可謂之偏而其琢磨澄汰之功于師友未有所得
出而接物動輒忤人終須察其無他始未免於不樂平
生知己焉得如公四海閱人抑安取此才非敏健而以
為可任智多昏塞而引之與言某雖妄而亦容事可行

則立決在他人一語之不偶故宦遊半世而無聞忽遭
清明如脫羈束凡胸中之所欲可悉達矣雖天下之達
官殆不過焉况復蒙汲引之公無不盡推挽之力必欲
亟援于塵土不知難近于雲霄已獨任于揄揚人備聞
其委曲勇于拔士誰復如今恭惟某官以魏國忠孝之
傳負本朝公輔之望每闕于郡國之小未究素懷所至
以人物為先此其大畧有如此質尤費生成竟出選曹
豈非僥倖某敢不益懋舊學以酬所知學者未嘗進謝

于門情雖不稱大夫真能取人以義報豈容私強為尺
咫之書莫殫萬一之意

謝鄭尚書張京尹啟

三年予寧已絕榮望兩譽溢美忽加薦論雖公朝方聽
諸大夫之言然露章乃得一不材之吏不敢以獲于上
而喜大懼以辱所知為慙伏念某心雖甚高習已近下
自為士已懷四海之慮若不克施繇從宦以來半世于
今未有可紀載忸怩而蹈俗破崖岸以徇貧欲申養親

之私遂干無事之祿中更禍變僅脫殞廉顧退處則分
宜抑不察之罪大方揣輕重而為從違希子功之力而
入帝城初無一念之敢到以當時之言而推官屬敢意
十年而未忘至數所長尤浮于實罷何足以致遠人已
病其執方事親不終又焉得孝律已無狀彼烏能廉學
徒為文政不及物是安可當執事之首薦乃欲使與英
俊而並遊或輓或推固不遺于餘力皆好皆惡終取決
于善人果以過情之言誤蒙召對之命恩出于上人推

自公恭惟某官無官不宜無才見善如出諸已貴已分
于喉古不知我榮士必借以齒牙蓋為國計致此譴薄
亦辱推揚某欲為實言非敢私謝自顧小已非長者而
辱長者之知惟竭一心待國士則為國士之報

賀王狀元啟

狀元監丞青箱嗣業紫電淬錄出烏卷之諸郎炳龍章
之峻采洞決藝文之興起膺物色之求旋升籍于太常
爰試言于便坐百斤置石首中于程文千佛冠名獨標

于異等被明綸而受職貳雄閫以頒條聊為吉筮之權
輿曷測官程之高大夫何履尚持秉謙勞猥示華牋過
形盛飾永言良愧交切銘藏

賀龔參政啟

光膺一札入贊萬機既得我公相與運廟堂之籌策爭
觀盛世及是明國家之政刑惠福生靈安崇宗社恭惟
某官行高而能鉅形大而聲宏惟仁義道德素蘊于中
故進退動止皆有常處九萬里斯展垂天之翼尋常瀆

豈容吞舟之魚自結審知亟躋華貫推姦邪之萌孽能使朝廷之不輕推學術之緒餘皆信儒者之所用當江湖之歎甚起凋瘵而肉之還定流民皆令如安堵之故具宣德意不徒為掛壁之文人當斯時知啟遠業果有鋒車之召遂登法從之班日對寵光居尚書喉舌之地竟膺圖任為天子心膂之臣士氣自此少伸公論于是復出拔援善類過於食而吐哺之勤慰藉人心若夫渴者為飲之易然竊視今日之事勢或似良醫之設施當

疾病將去之時而氣血未充之際用人如用藥豈以既效而弗圖畏惡如畏風定知自衛之益密盡出生平之韜養以為不世之功名某自恨凡庸莫償知遇敢作雷同之賀有負門牆輒申管見之私以附干瀆其為僭卒未易貸原

賀周樞密啟

恩隆麻命班首樞密富貴非公所安寧以是喜功名為國乃有要不可辭一身尊榮四海安帖恭惟某官德溫

醇而有本行縝密而無暇文如玄酒明水之真正氣具
足人似光風霽月之潔塵意俱亡惟平素結知于上者
深故晉用不以非道而屈若禁之夜半之素語乃當世
朝陽之一鳴小人知朝廷之不輕公道至今日而未泯
致身明白肯以利回因時卷舒乃為君起擅四禁絲綸
之地嗣三王盤詰之風學未宏施士猶共惜論道經邦
于廟堂之暇不忍詭隨于人折衝禦侮于階楹之間自
能立表于世夫以儒者而經武斯見聖主之慮危權一

歸公論僉允協然而位尊顯則責望備時豫暇則憂防
深兵多冗食故生民之力傷將不公選故鬪士之氣沮
至若外敵之難制豈如內傷之可虞羣狂當鹽法之變
更徂伺嶺表諸蠻持馬市之上下虺撼坤維姦民或據
山海而披猖驕卒近在畿甸而凌驚天下之脉概可見
矣君子之心寧不瞿然勝固藏于亡形豈容竊料人不
知而視影安得無疑某少以戇愚誤辱提誘忍懷不盡
之意殆為入賀之言蓋不學劒而學書自古有姦雄之

可慮儻不以規而以頌是今為軟靡以相期豈惟失疇
昔依人之心抑恐非賢者樂善之意仰犯崇重不勝凌
兢

賀劉樞密啟

擢自坤垠入毗極樞自州牧而與政攷中興不過數人
以儒者而掌兵在今日誠為遠慮國有與立世無所憂
恭惟某官誠實無他端靜不撓自為士已任天下之憂
樂其致官不為世俗而從違未嘗以家事辭王事之難

故不擇地而處所至視官物如已物之惜蓋本愛民而然履行績密而無瑕聲名暴白而不愧在朝廷則能令所居之官重制藩閫則必動已去之民思悶悶之政若不快人卓卓之功每見于後邈是巴蜀當國西門外有大敵虎視于藩籬內有羣蠻徂伺于肘腋況方饑饉之至而有根本之虞公適遄征人解憂色不為棄崖驚異之政百姓信之則同皆謂文翁廉平之聲近世繼之者此趣歸右府允穆僉言仰惟治朝立國之規實在樞密

制兵之地兵之進退雖屬之將將之廢置則歸之朝儻如身使臂而莫不從制其誰敢侮其或脛如腰而不可信屈安得勿憂欲反泰阿之持喜歡成器而動師出以律乃在于國家明政刑之時賢用則安豈復憂廟堂有甲兵之問某舊遊牆仵久鬱廢瞻式逢君子之登庸竊為蒼生而替喜凡所謂斯世之利病繼自今以次而罷行不得即賀而以書深慙無益復敢出意而論事姑謝所知

除贛州謝丞相啟

恩隆起廢遽叨分竹之榮分薄挺災已被負薪之疾未
免瀆陳其弗任奈緣法守之難踰徒抱素心莫回成命
竊惟汲黯不省復收之意乃稱病于淮陽望之妄懷不
合之疑遂移疾于馮翊雖強拾古人之遺意然終非臣
子之至情所以史氏未免有褊心之譏而後世亦薄其
左遷而動此豈君臣之交泰致令誠偽之相蒙聞事不
實而實事不聞信者或疑而疑者或信雖習俗之固爾

豈為士而不然伏念某壯不如人老而益衰少日早櫻
于霜露終身從事于刀圭故其羸劣之軀不勝勤勞之
責昨少疲于奔走氣已亂于降升曲荷皇明賜休湯沐
逮出守荊州之地愈不堪雲中之寒尚稽報政之期已
有乞身之請惟君父諒其素守不敢肆欺以祠官祿其
餘生母俟再請十年退處百疾交攻方沈疴為孽之深
忽寵渥自天而下欲悉陳狗馬之狀乃薦申螻蟻之情
以避免之章難至于再三故懇祈之意莫伸其萬一尚

蒙委曲獲脫譴訶茲益伏遇某官獨秉國成密參天緯
凡有生之疾苦幾有不知寧敢暑而爾裘乃可以罔但
欲廣搜羅之意無復推姑息之仁雖在罷癯亦欲任使
某敢不免旃醫藥勵此身心儻日月之尚寬容其養病
或筋骸之復舊焉敢忘君

代表守賀刑部周郎中啟

丁酉冬

拜命紫宸為郎禁省刑章滋甚或者疑風俗之益偷君
子憂深謂當自本源而置力安可徒徇其末而以求勝

夫民然在上者惟恃國之法而不任人在下者惟軋人之情而合諸法凡具獄而上者多傳文以成之儻于吏牘而無疑雖有枉情而莫辨故聖人不以聽訟為知本而賢者猶以得情為可矜恭惟某官智每用而益精材遇事而立見為邦伯而伸萬物之氣情偽具知佐廷尉而持天下之平輕重悉得顧憲部久虛于郎署宜聖皇首屈於仁賢雖非超躡之除益有深遠之意歲斷獄僅于四百昔人乃歸之養民之君律為條至于萬餘當時

不能止犯法之俗惟公可以論此斯人固有望焉某濫
守專城竊庇廈屋忽聞成命倍切懽情

欽定四庫全書

止堂集
卷十四

止堂集卷十四

欽定四庫全書

止堂集卷十五

宋 彭龜年 撰

牋

壽聖隆慈備福光祐皇太皇后上尊號賀牋

盛德難名徽稱載上璽書播告海宇歡欣恭惟太皇太
后殿下配地無疆後天罔墜三朝揖遜定于半語之間
萬世功名蔑有一毫之德宜修鉅典用侈鴻休臣阻趨

追班無由稱頌臣無任

壽成惠慈皇太后上尊號賀牋

至德難名海涵春育徽稱播告雷動風行於昭子道之
成有赫孫謀之善恭惟皇太后殿下德全坤順位配乾
元雖以經營無外之功不忘儆戒無虞之世三朝揖遜
密贊睿謀一人元良動稟慈訓以天下尊親之至未恆
宸衷率百官若帝之初載隆曠典一傳顯號大慰輿情

壽仁太上皇太后上尊號賀牋

載搜曠典寅奉慈闈五日一朝安受大明之養十行細
劄同歸太上之尊於赫徽稱有光昭代恭惟太上皇后
殿下位配皇極道參坤元視太姒之嗣太任于今為盛
繇長樂而朝長信自古所難仰惟聖子拳拳之心欲慰
天下睽睽之目誕揚顯號庸盡親歡

三宮加上尊號賀皇后牋

太上立德早定孫謀天子尊親式昭嬪順徽稱播告寰
海歡呼恭惟皇后殿下與日竝明如坤至靜退安象服

上嬪太姒之嗣任入問龍樓遠紹英皇之佐舜典冊雖
由外舉愛敬實自內修禮行有期慶流無盡臣叨塵法
從冗食祠官扶杖隨癯老之民喜聞明詔奉觴如家人
之禮遐想盛儀

光宗皇帝加上尊號禮成賀太皇太后牋

丕藏明禋對揚前烈大稱載舉四字具宜竊以堯無能
名莫言其盛又所以聖蓋有自來恭惟太皇太后殿下
太極嬪尊坤元叶順鳳輦昔朝于長樂稔聞母訓之言

鴻名今薦于顧成益見孫謀之善臣欣傳曠典屬守閒祠徒深翫忭之情莫造龜趺之列

光宗皇帝加上尊號禮成賀皇太后牋

謁展圓丘禮崇清廟竊以舜帝主祭而享始于媯汭之嬪虞文王在廟亦臨實以徽音之嗣姒故推本其業業之孝必求端于雖難之宮恭惟皇太后殿下尊配乾元厚侔神載承天之序豈獨蘋蘩蕝藻之告神奉先之思宜及神聖武文之廣德大稱外歲美化內流臣適奉間

祠莫趨行闕側聽鴻名之舉徒增鼇忤之歡

代京尹冬至賀皇太子牋

日行北陸忽驚一氣之回位正東儲早應少陽之長邦
家茲始社稷同休恭惟皇太子殿下貴貳一人道兼三
善進而問寢相欣愛日之長退則憂民必有書雲之喜
承天之意與時偕行某適以疎庸誤司浩穰竊聽黃鐘
之律頌覺聲和遙瞻碧鏤之宮莫展趨賀

頌

張京尹中和堂頌

十首

中和有堂其堂穆深花竹陰陰戶闔沈沈堂中之人玉立恂恂昔有斯堂今有斯人

中和有堂內蔽外整湖後若駐江前如騁靜不忘應動不忘信昔見之堂今見之政

茫然太虛升降盪摩鍾粹于人不偏不頗存之為中其發也和而欲不存發將如何

亶是天中實維賢哲設以持養義以區別以導斯民如

表之揭視聽言動春風芽茁

其視惟何胸中瞭然舉是以鑑吾無醜妍彼姣而悖此
惡而蠲匪視之流所全者天

其聽惟何不淫乎正寧如予逆弗溺彼順多言不工法
語自聖匪聞之聞實養于聽

言出如城動安如山非言之愛出不復還非動之難輕
則不安循爾發見求其本原

夜氣未離何物不官惟今之俗鄙薄險艱惟今之政瑣

細猥繁以政正俗如激上湍

安得從公一堂畫永弗棘弗隳弗靡弗競有庸彼勢有
罰彼膏我心如何雲飛川泳

水毀于東火暎于西天地中和云胡亦虧變之調之有
君有師入佐天子視公如箕

銘跋

寡欲銘

人誰無欲多欲即昏天一之水離之則渾寡欲有道為

善最樂此長彼消乃壽之藥

為教國輔書南軒虛舟銘跋

心本虛理則實酬事物無轍跡來不迎去不留
彼萬變我日休行斯道險可濟乎豚魚貫天地
曷臻茲在克己去其窒斯虛矣

彭某為國輔書是銘或者問曰此非南軒先生為詹公
體仁作乎然先生既以虛舟名公之齋一日公謂先生
曰漆園之說遜而離吾無取焉爾在易之中孚利涉大

川乘木舟虛也吾將于是焉體之先生歎公之善思也故屬之銘然則國輔安得有此曰是理與都會相若凡有足者皆造焉而子猶介介然若有藩籬之間殆非虛舟中人也并跋
箴

訓鉅箴

并序

甲子春鉅子主道之寧遠簿將之官趨庭請益
焉書十箴以警之

官到任子荷國寵恩子不勝官為負其親匪負其親乃

負其君汝若不負當語汝云

右引

人謂能廉乃行之細細行不矜終為德累賜不受命豐

約必計竟墮貨殖萬牛莫掣

右廉

胸中泰然大可容天偈偈仄仄一室如信居寬有道以

人治人毋忿于頑孰非吾仁

右寬

用心而公酸醎同功以私間之肺肝華戎汝觀平衡金

羽折衷低昂非我何適不中

右公

萬斛之舟繫于一矧元氣不完百脉皆病易有吉凶惟

以貞勝萬邪莫干孰不聽令

右正

民國之本仁人之根其根不立他何足言不忍于人斯

仁之端不忍于己人斯寡恩

右仁

人貴乎明不貴乎察汝職勾稽細大必達毋遺泰山瑣

瑣毫末所得幾何卒陷深刻

右明

民生在勤弗勤則匱自匱其身猶事之細仕而不勤人

必受敝勿謂簿書徒勞人意

右勤

臨事貴敏匪緩匪急緩則失幾急則傷物惟能明理動

明不括何以能明惟學之力

右敏

學優則仕不學如瞽奚止面牆將亂璞鼠惟學有益豈

云少補汝儻知學吾言皆助

右學

初筮箴示欽之官莆中

吾仕于國無一世勤乃于爾身受一世恩是恩欲報非
忠不可儻忠于君即孝于我吾語爾忠心不可欺勿為
利怵畏害而違趨利避害撫心而背是為不忠殞身莫
悔吾為此箴當爾旌韋出如以隨入如以歸處事以公

所謂處事以公者且以爾所職言之納監人惟欲其少受鹽人惟欲其多少納以優亭戶可也亭戶辛苦豈可多取偏于一處皆是不公以至聽訟接物每每如此須是參攷已去偏黨無一毫私方謂之公舉職以

勤御吏以正撫民以仁謹以事大和以接物

所謂和以接人者非

媵娶說隨褻狎便佞如小人之為也遇事勿先發以沒人之長有善勿自街以形人之短才任吾上者盡敬以親之位在我下者自下以接之勿雷同以亂是非勿惟私昵以植朋黨若識中庸所謂和而不流義斯近矣惟

儉與廉治家及身

所謂治家以儉者儉是事事收斂就實如衣只要便體不須華麗器只要

適用不須好巧食只要充飢不須精細如管待賓客不可學人豐腴只要至誠每每若自安于儉番外慕不生斯能廉矣要廉須是儉不可不知
汝往欽哉以復爾名

冠辭

冠鉉辭

并序

古者重冠故儀禮以冠為首後世冠禮寔輕先
正蔡公端明冠其子僅能書祝醴等辭畀之慶
元己未三朝之始吉日癸巳加鉉元服既昭告
祖廟且踵蔡公故轍詔以儀禮禮記辭義庶存
古也既醴而字之曰節

曰鉉汝來其聽我辭鼎曷用鉉鉉胡玉為大易有訓義

匪易知鼎為器重惟鉉舉之鼎既舉矣七載畢持委鉉
于鼎若無所為以鼎用舍匪我斂施為鉉以玉其德實
宜其德惟何廉而不歲萬物芸芸所賦不齊太剛則
折柔亦不支不中其節均與用違美哉玉鉉無偏無
陂謂汝剛耶始勤終墮謂汝柔耶抗志不卑或佩爾
玆或易以韋不中爾性故以鉉規字之曰節汝其審
思

冠漸辭

并序

姪孫漸冠為辭以祝之長至日止堂辭

一陽來復加爾元服如陽之初初罔不穀顧爾角牝俟
馬已冠棄爾幼志視爾之先

右初加

再加皮弁益綰其儀凡厥庶民孰不冠而進汝于士詩
書禮樂永膺爾福勿墮爾學

右再加

于焉三加爵弁戕戕天爵既修人爵靡他敬爾威儀謹

爾言語永終厥德受天之祐

右三加

名汝以漸字之曰巽厥義維何易有明訓千尋之木長

于膚寸溝澮暴盈其落亦迅躁言數窮仁者則訥疾趨而蹶不逮相儼躡等之學雖敏弗遜巽以入之千里發

輶

右字辭

祭神文

宜春縣尉謁社稷文

惟民天生之社稷食之君命吏臨之惟神鑒之尉亦吏也于民事敢不盡心令以視事之初具清酒庶有奠于壇墮非以自獻而已亦曰社稷食民之神當為民敬

謁仰山行廟文

某以天子之命來尉于此凡名山大川國所常祀者皆當祇謁焉惟仰山之神能時雨暘以冀此邦某以官守未能即山之麓薦禮展誠輒于邦人嚴事之所以冀有酒非敢不敬惟神鑒之

安福縣祈雨文

癸卯夏

天監不遠一念即通人欲未從煩言成蹟致民之請知罪莫逃伏念某等竊祿成貪蒞官無狀諸吏暴橫而不

知禁止百姓饑饉而無以拯援仰干至和乃召仍歎屬
天時之偶順幸穡事之將登一雨愆期四郊缺望雖禱
祈之既久然昭格之尚遲謝罪無門籲天有路爰致靈
湫之餘澤敬開真字之玄科自三日以往為霖儻蒙賜
賚無一夫不被其澤皆得承庥

安福縣祭疫癘神文

某惟此邑春夏之交疫疾大作間有家死數人疾猶未
艾嘗考其俗皆因不服藥所致徐詰其所以則云神實

禁之夫天地鍾至和而為人其飢而食寒而衣疾病而藥無一不取足于天地天地予人之藥以衛其生而謂神禁人之服而致之死有是理乎此皆由巫覡之徒欲假是以神其利己之術而俗醫用藥多不得其當往往不能起疾則舉而歸之神以逃其殺人之名而謂神實然非某所敢知也俗惑既深單詞難釋今命醫者行視諸坊之病而官給藥以治率舉辭焉用是不敢不告惟爾神血食此地亦猶某等祿食此邑其念斯人之心必

無幽明之間也惟神相之

安福縣祈雨文

丞攝
令日

惟是邑頻年旱暵民物彫瘁邑吏困于奉上之不給無力拯民道殣相望徒增盡傷今年雨暘時若稻秀相穉數日不雨人情恐然此皆吏無德所感非民之罪惟神社稷云實相稼穡諸廟云血食此土必不以吏之故移哉于下敢用昭告儻霈然之澤不日同浹使民有千倉萬箱之望實惟神休神雖不責報于吏吏亦安敢不敬

袁州權郡謁社稷文

社稷有功於民民百世祀之吏無德於民民不能一日
安之郡視社稷非以報也亦以勸也某敢不敬

祭仰山神文

邦人祀神其始其窮神亦惠人莫知其終吏之去來何
啻傳舍而況於某暫攝民社視神于人孰昵孰疎儻拂
于民神豈庇予酹此尊酒非以祈福誓安斯人敢介于
祝

江陵府謁社稷文

其得鎮古荆祇見社稷敬共農事惟守之職不違農時
穀不勝食儻戾斯訓神罰勿逸

謁東嶽廟文

惟神受職岱宗廟食于荆雖非其地之山川守所得祠
者然神之庇民民之敬神無遠邇一也敢以民情涓滌
告至

江陵府謝晴文

天作霖雨害我滯穗吏實不德召此大沴奔告于神神
不我棄氣鬱忽明欲雨輒霽豈吏足矜惟民之瘁神實
念此卒掃陰翳俾民婦子獲斂獲刈千倉萬箱訖此豐
歲敬拜神休尚幾終惠

祭旗纛文

六纛之祀從軍祀也神其佐吾軍毋從妖孽以譁吾衆
則神不愧吾祀

祭文

祭鄭樞密文

惟公廉而不劌和不流學得玉山之正傳人如元祐
而不浮進不斲于苟合退不襍于好修廟堂之上侃侃
如秋霜之厲猷猷之間溫溫如春風之柔人方競為虛
名公屹立而無儔暨玉石之俱焚獨表表而莫仇人皆
窺識度之不凡而非苟異以自謀者也前疑後丞與同
戚休何翩翩兮來歸竟去晝而莫留知者以公為無累
于物不知者徒以為自拔于一猶若公心之耿耿竟長

往而難諫其辱公之知最深間何闊兮星周望蒲海兮
千里欲一慟兮無由意不足兮矢辭永相望兮千秋

祭孫達吉侍郎文

嗚呼從之而止于斯陰陽降升參差不齊厚則多滯至
清易滿君獨不然何施不宜百未施一而止于斯金匱
石室補罅鳩遺才適其官川泳雲飛青蒲一言奸詭魄
撕是是非非曾幾何時如君閱世瞥然電馳其遭既難
既合即睽天胡然邪美成者希嗚呼從之而止于斯余

之交遊落落無幾或殂乎東或殞乎西情親志同況君
匪夷山訃忽傳涕泗交頤雪霜貿貿名木多萎命也奈
何孰知我悲嗚呼哀哉

祭趙介之參議文

嗟嗟介之兮委世如遺去不復返兮去將安之茫茫宇
宙兮浩無津涯顧塵世雖若可厭兮彼汗漫亦難期嗟
嗟介之兮云胡不歸公朝而出兮娛娛暮而入兮怡怡
心如春風兮無物不宜一日不見兮人誰不思人方思

公兮云胡不歸梅的皪兮何萎橘累累兮若騎昔焉芽
蘗兮倏已離離往培植之不足兮今已勝雨練而風披
君亦懷此兮云胡不歸嗚呼余之與公兮不啻塤箎忽
捨我以去兮我誰與比景豈不猶昔兮人焉已非觸景
以望公之歸兮云胡不歸余豈不出兮人誰我知人奚
不我顧兮疇如公夷九原不可作兮君之何其酌此酒
以永訣兮齋容涕洟

祭陳司法文

癸巳冬

君家于閩兮余楚之尾聲不相聞兮跡不相值忽作遠
遊兮宦予之里一握之笑兮得之聲氣之類余不期見
君于生兮亦豈期一見而即逝嗚呼天下之變不齊兮
非九九所能周傾蓋之樂兮獨不可留肝膽楚越兮今
白頭余之與君兮誰使之如聚散之鷗君有母兮髮垂
白思君千里兮若咫尺今猶倚門兮朝夕君子兮方髻
聲琅琅其誦書兮已無穉子之驕老農既去兮誰耘此
苗君有友兮余三人送君之柩兮江之濱月白兮風清

終今已往兮為君銷魂

祭寺簿劉子澄文

嗚呼我之從公踰三十年義曰師友情實諸昆濟所不
及言人所難或滯而輓或墮而掇左提右挈無往不然
既見而去如隣而顛思之不見如溺需援分則有親好
無此堅聞公生瘍眊膚斯頑人謂斯疾懼不可全我有
親喪欲往莫前朝夕聞公書劄翩翩以字勁弱與詞簡
繁卜公進退憂喜伏焉期以終喪問公螺川理棹已穩

方解拘攣一朝有友自公所還問公如何口噤氣填忽
云已矣握手涕漣嗚呼我公何去我之速邪終今有疑
孰與告邪我有文矣孰與暴邪天非冥冥孰可復邪樹
善如斯孰傾覆邪有志未竟孰與續邪嗚呼已矣尚忍
詞而哭之邪

祭寺丞呂子約文

戊午
九月

嗚呼子約何止于此與君相望曾不百里書財幾日不
交于軌日有駛卒忽至自米謂君溘然神為之褫謂不

然邪匪惡曷毀謂其然邪天胡云爾孰字不彙孰彙不
彙始疑而悲復遣以理有友書來為言所以天不可諶
亡此友矣嗚呼子約而止于此氣聚必散人孰無死而
我何悲于君之逝君之胸中如水無滓而我何歎寡妻
弱子魂無不之曷此曷彼而我何憾蕭蕭野寺天道流
行終必有始君而不壽我獨何俟有循莫羞有酒莫醺
哀恫鬱結徒有此紙

祭戚教授文

嗚呼伯瑞止于此邪一氣聚散抑其理邪散不足憂聚
何喜邪而我拳拳悼君死邪抑有所感不自己邪交遊
固多孰君比邪靜而不浮山之巋邪動而有勇川之逝
邪稟氣之全如此幾邪命之不長其誰使邪嗚呼已矣
吾誰啟邪莫寄此哀惟此紙邪嗚呼哀哉伏惟尚饗

祭趙漢卿將領文

嗚呼漢卿如矩絜兮天分界特若有截兮飾身謹嚴動
有節兮凜不可干如冰雪兮所積既豐謹當艾羞兮耆

年疆半遠殞絕兮卜宅之原祖兆之側兮雙劍同藏其
終開兮蒞萌肴熟饋饌餽兮酌此尊酒以作永訣兮自
今團樂不見此圭潔兮

祭孟浩文

嗚呼余與養直分則朋友情均弟昆往官宜陽有盜略
境將師遠屯王事鞅掌母不得將闕焉清溫養直聞之
入告其母踉蹌及門迎置其家堂萱之旁十數朝昏安
余于疆戮力王家于屏于藩余母既亡臨弔其孤嗚咽

聲吞切切悵悵渠渠愛憐瑣細不論逮及同朝官雖不
同同一心源有善相告止屬其居出侍其軒君去復來
我不能同君無後言及余去國曾不期年亦未左轡譬
諸木實氣至即殞遲速奚論握節捫參聲容沄沄溢出
於坤余方屏居喜君之風灑此糾絆別無幾時訃書墜
前神驚欲擗雙劍于飛間不兩旬噫其尤冤君其悼亡
凡喪百須藉君猶存君既溘然雙女惻惻誰嚮誰飭其
誰奉君而夷于堂而沐于櫜天邪人邪以至此極不可

推原昔與君別于此江干猶幾其反及其反也望天之
涯招君之魂人生幾何遽隔死生如手覆翻往不可追
來不可期有淚潺湲嗚呼哀哉

祭十二姪縣丞文

嗚呼惟予與汝兮序同父子惟汝視予兮休戚一體如
手之運兮如足之履信誼進退兮惟予心之使余行千
里兮汝徒以侍余疾且死兮汝噓以續其將絕之氣余
欲善其族兮汝耘汝耔余欲遏其惡兮汝屹然猶中流

之砥汝之生兮余猶有恃汝既死兮余其已矣豈惟余
失左右之助兮抑家之否柳之風兮淒其梧戴月兮天
低耿耿乎余懷兮惟汝知之汝不見兮我心傷悲余疑
兮誰決余有得兮孰識經畬一蹙兮淚盈臆視影空堂
兮汝竟付萬里于不說衫疎疎兮煙浮陟復降兮一丘
千秋萬歲兮汝惟此避今日汝往兮余不能令汝之留
異日及泉兮又安知無山川之阻脩旂揚揚兮去只魂
杳杳兮山之趾囊肉為餅兮剗肺以齊饗人所尸兮汝

平日之所旨嗟余之姑息汝兮不能如屈建之循禮猶
庶幾汝一來兮寧謂余為不知嗚呼哀哉

止堂集卷十五

欽定四庫全書

止堂集卷十六

宋 彭龜年 撰

四言詩

廣壽

人孰為壽壽莫如德日新又新終古不息學以明之先
正我心所欲既寡山崇海深

許國公生辰

有序

某幸分教公府茲承鈞座垂弧令旦無以自薦
其區區輒以恭儉惟德之義行之為詩四章章
八句併以其字為韻次序辭雖不足意則有餘
矣伏乞采覽

入事其親愉色融融出事其君惟命之從威儀抑抑曷
不肅雍有而弗恃是之謂恭

天下之惡不如一僭天下之善不如一儉物有不足于
我何欠人欲無窮儉乃防檢

人不自泰以居故移人不自奢由養所為勝之有道惟書與詩願言君子載思載惟

恭自內出儉非外飾恭儉而實是之謂德作德日休心廣體逸何以曰壽由是而積

鶯鳴十章寄臧伯瑞

有鳴其禽其鳴維何有懷其人我心靡他
禽其鳴矣惟其醜矣我之懷矣惟其友矣
惟動有幾萬變形之視聽與言難遏者私

孰愛于母惟善其善孰友于兄弟我獨終鮮

有水涓涓石鑿鑿兮日湔月濯成此圓潔兮

有澤其涸有山其落有木而桷則以其斲

靜觀物理式感我思有風淒兮吹我裳衣

春花粲兮兩山之間誰與我適觴咏以還

日升于東月生于西惟神之馳曾莫知所之

莫克匪已莫玩匪理有懷于是不知子之所止

胡廣文以直養名堂余舉伊川之說問之往反數

十言終未判也再以是訊焉

以物養物如水沃木推彼有餘益此不足惟直與氣如
木有根本既充盛枝葉自繁氣言其形直言其理與生
俱生無彼無此云何謂直養此氣耶直果外來氣內出
耶孟氏此言我知其自則以告子以義外計謂直養氣
其差則同疑其不然願放我蒙

五言古詩

九日分韻得去字

甲申

昔從招提遊岸柳擘新絮那知再到時葉落滿庭署爭
如青青松寒暑了不與古幹屈龍蛇依然舊遊處觸物
轉多時何以消百慮陶潛早解此撒手賦歸去紛紛世
俗流何用苦懽飫試問皎然師茶香得誰助

別趙運使二首

丁酉
冬

君子豈無欲有欲未足憂百計護此短此心尚可求向
來畏人言言者不肯休不畏固未可無言我誰尤事當
究本源瑣細不足籌有疾不忌醫膏肓尚能瘳

用民如用馬可御不可馳論人如論醫貴常不貴奇古
來才智士日與功名期儻遂李廣侯文帝數乃奇先生
盤石宗一節江南歸聖皇夜半席寧以鬼神移遙知清
問下萬里寄一辭當使鰥鰥牛不獨見乃知

送廬陵李宰養直之官兼呈劉寺簿四首

戊戌夏

理財非鑿空簡訟在謹始林繁去冗根庖漏無溢水此
理容可觀妙處要深體豈惟宰一邑天下亦如此
治邑即治家愛民如愛己不須馳廣莫觀遠自近始君

才成風斤鼻惡有餘地吾言尚敢狂快處須反視
入仕不為宰無異面牆壁如何今世人指作富貴厄區
區為身謀反謂第一策皇皇百里民誰為訪休戚
澡身有至理面垢吾能索負背膚所受非人孰湔滌詩
人有良玉猶藉他山石沉復吾所師且喜得親炙

別劉寺簿子澄赴岳州倅

壬寅夏

新蟬鳴高柳輕鷗弄晴川浮家作遠遊觸熱豈所便武
昌古都會形勝兩國肩貔貅雜民居烽火照敵邊朝廷

重牧守尤需治中賢君侯文章家班馬不敢先墨莊一
種子落實今幾年瞠乎出其後獨得道學傳誠身自孝
悌玩理潛天淵悠然靜中春洵洵風濤前四海滿譽望
諸公爭挽牽容臺志不舒別駕用未專去就抑何心行
可吾亦然余也溝瀆質誤辱青黃妍工夫懇切切習氣
猶拘攣居然作別離欲別思縣縣歸鴻幾時來江樹底
晚烟

別張袁州五首

愛民有誠心發用非己私齊王累已見乃以小大移冠履自貴賤痛癢一體隨萬事有定理應之當坦夷儻以我好惡定非真是非光風霽月中寧許栽藩籬

富貴不可求名節可不修韓公三上書所願畧不酬柳子百世文莫洗一日羞要須外無累乃免罟獲憂青青最高松藤蘿所綢繆繁陰豈足羨試看風露秋

表人思君侯事事皆甘棠君侯亦念之疾苦如已傷向來趣引翰詔許仍舊章抗疏論不足古人所未嘗此請

久不下公歸奏明光渠儂未知公尸祝無相忘

弦急無和聲行疾多窘步從容應萬變乃有天下度先生經綸才所至祛百蠹一州直易耳治者弗敢措弱翁霽威嚴猶被功名誤孰知過仁一蹴超聖聖處

平生學不力莫移資稟偏疎愚寡周防戇直紂巧譎出身仕官府何幸依仁賢樸樾本無庸刻畫幾成妍江湖政浩蕩雲漢難攀緣何以慰我思一語當韋弦

別宜春柯宰

秋風掠梧桐歲月去如擲功名趁彊健君子有行役朝
家政急賢黼座不滿席巍巍廟堂望留客良獨惜誰為
君蘭言亦有子公力居然懷墨綬懽喜動顏色宰邑世
情難指作富貴厄公嘗為我言百里豈擯斥雖無槐鼎
貴均是代天職人方事趣辨聲譽已赫赫公獨安其常
容與不可迫靜觀物議定豈止較尋尺願公充此心壽
此一世脈行行見天子清問下文石區區嘗試語要不
若親歷公看江南貧此豈州縣責

和向侔韻

誤身利名場無異一釜甌置之水火間謬以力取勝人
生具天則發見亦有證如水行地中投隙即流迸但恐
人欲縱勃若一民橫志師儻自彊萬慮當退聽誰能學
禪伯絕物以求定吾聞至人言當識動中靜萬變不可
齊一念終難正口耳固在我視聽復誰令須從事上學
寧有物外性能用使太平不用我何病斯言聞亦多究
竟終未瑩從今三爇香願以公為鏡

再和

今日若馭風前日如負甌乘興試一出意到即為勝薌
林有高人能識未病證談鋒不可遏勇若春筍迸美名
戒多取夫子無太橫鍾期不世出誰作山水聽人生具
物則天命我當定起居孰非真寂滅豈是靜毫釐不密
察天地失其正聖學有終始謨訓嚴于今窮理以致知
持敬乃成性倘從口耳學莫救膏肓病大本若不立寧
論語未瑩塗澤欲自妍何以逃水鏡

別孫隱甫

甲辰
秋

君家金石臺我家富壽岡十駟苦不遠半世成相望我
為一貧驅觸熱來帝鄉塵垢面未頽鬱結志不彊下馬
忽見君喜劇幾欲狂未語心已傾既坐形俱忘醒我醉
夢中被我冰雪旁主人知客深對著夜雨牀猶恐客意
短渠渠羅酒漿蟹螯擘新肥荔子含生香晚歸候月影
早游趁湖光都城六月中公卿簿書忙而我乃與君專
此風露涼笑語雖雜亂理到味自長平生區區願恰此

一月償遽然委我去令人熱中腸兒女惜別離丈夫重
行藏敢因杯酒行感慨徒悲傷君去起我思綵衣拜重
陽願言各努力白髮行中堂

送劉寺簿知衡州

甲辰冬

刺史官已尊柳左郡尤古太常墨莊家帝命分竹五扶
搖負勁翮巨浸落雙櫓誰能極所至千里看舉武紛紛
輻兩朱局局印一組世無元道州萬物氣不吐

藥翁吟

庚戌

有翁憂思深挾藥救一世大聲疾其呼負篋即都市凝
視徹河漢覘色見腸胃巍我一男子面澤勝粉膩翁前
亟與語腴理中邪沴再三猶不聞掉臂若欲避塗人競
擲掄母乃太逐利那知此翁心肝腦作布施厭見大官
醫十謁九不值高車索禮貌疑疾致金幣侵尋疾已深
鍼達不可暨卻推主人癡疾欲勝砭劑天寒日以深衰
態日以至稍覺念翁來西風政憔悴

送楊誠齋赴江東漕

庚戌冬

愛公喜公去愛國喜公住公去不可留一節江東路停
杯與公別瑣瑣不足疏金陵古都會形勢天所付江淮
有前蔽荆楚無後顧矯首對山河亦足發外懼錢唐六
十年帖帖泰山措繁華視舊都無復郇瑕慮郇瑕僅憂
貧雖貧猶未歎安得小范老前席借一箸重畫汴洛謀
起此宴安痼金粟互輸送甲兵更守戍去來倘習慣緩
急乃瑕豫耳聞不如見公見沉起悟願公細平章心期
一言寤從此日暮雲不外錦囊句

壽張京尹

紫巖天下志勇決如百川一身扶三綱百醜妬獨妍南
軒經世學仰嗣千聖傳忽忽造滕陳衆鳥驚虛弦油幢
入楚澤不復夢細旃公乘一節朝遇合君適然物弛久
必張後美開諸先區區人力衰今乃還其天夷夏早知
名家國嗟獨賢用大力有餘入細心愈研三年尹王都
警析清夜眠忠言出荷橐妙斡天機旋反視班伯輩但
覺口語讓要知源流異孰似周公前江湖秋已多宇宙

清無邊氣凝萬類實人亦體其全沉是嵩降辰誰頌春
容篇願公如紫巖而復得君專願公如南軒而享箕翼
年赤手洗甲兵黑頭出貂蟬卻從祝融峯高處尋倥傯

酒醒

世間顛倒事一切自酒出醒時清明心醉後不可覓醉
時顛倒苗或發醒時實酒能醉人形不能醉人心心儻
有主宰萬變不可淫大禹惡旨酒拜善功最深

題王仲顯梅谷

樓前梅十圓負背花千樹種花識花性培養隨好惡花
無十日好不憚千日慮那知花已嬌疲憊風能蠱爭如
歲寒操盤結不擇土時當氣栗烈天地閉其戶蓬蓬起
南海呼吸萬竅怒向來桃李輩縮氣不敢吐惟有冰玉
姿秀發畧不沮靜觀萬物理參差乃如許不見千金子
宴坐危堂廡一朝遇變故倉猝失所措不見陋巷士脫
齒甘梓茹脩然天地間了不識憂懼達人善觀物在我
乃不喻須上最高樓方能了真趣

送李眉州

辛亥
三月

出捧毛義檄不違菽水歡歸侍潘安輿能宣詔條寬古
來忠孝事兼此良獨難是心無中邊寧擇陸與盤區區
平反念雖喜不勝殘那知容色溫足使田里安韋編三
絕書十載胸中蟠用處義自精何適非其端如水行地
中渾渾不可殫尚恨斗大州不足觀其瀾我昔欲見君
恨不生羽翰及茲與君別一飲盟已寒人生聚散情欲
語徒辛酸惟此一寸心萬里聊相觀

送張少卿知漢州用漢字韻

家傳張長公

張摯字長公釋之子也坡詩云滕上王文度家傳張長公

直節可敬

嘆居官不取容安有鄙夫患奏劾司馬門乃翁寧可犯
驚蹕當罰金法令戒反汗奈何盜環人使遭滅族難惟
摯有父風彼美淵明贊由來陰德深雲仍繼名宦西州
清河家簪紱誇里閭我公翰墨英蚤歲擢三館立朝物
望歸駸駸歷華貫萼美忽思歸周邦喜良翰三節歌皇
華風采肅廉按召歸一再遷卿月光有粲廷尉天下平

異論乃冰炭守道當守官聞風志立懦分符復西歸顧
憂寬宵旰廣漢最繁麗地望蜀郡冠房湖天下稀公餘
可吟玩十頃玻璃風和氣來隔岸過家亦足榮觸熱去
不憚三世居此官盛事聞見罕甘棠百年思蔽芾陰更
滿少城我從公轉首歲六換人生一浮萍誰料聚與散
荒涼更寂寞一笑得承款東之宰相材自是一好漢
坡詩
嘗用一好漢事舊載武后思得一好漢而用之狄仁
傑乃薦東之新唐書段一奇士不惟失本意而亦無
味
大手當調羹先試五花判願言堅晚節功倍事則半

衰病卧漳濱尚念劉公幹

慈順堂

我官廣文館門巷正蕭索王孫幸過我開口有請託索
詩慈順堂一再不可卻人心有太平此豈易描摸天天
吹棘心韡韡燦棣萼君方大歡足天地費酬酢而我獨
零丁詩復那可作因君索詩苦謾薦嘗試藥中庸十五
章

謂第十
五章也

此理非外鑠反身若不誠為善終未樂

尚絅堂

人情畏所見假善以自欺不畏或未死心偽誰能醫風
雷動淵默日月行屏幃念起物自形矢決猶可追而乃
如琴張堂堂亦何為君子非惡文文勝質乃衰試看堂
前草安得青如茲

同陳祕監諸丈送黃商伯守常州石叔訪守上饒
會于艮山門張園以人生五馬貴莫受二毛侵分
韻得貴字

惠山滋華池玉山潤百卉二賢競出守山水亦自慰人

生別離難朋舊走相謂尅期會南湖肯託簡書畏敬酌
萬石君欲歎不敢愠願如玉山高物飽生氣又酌雙
井公一舉大白既願如惠山清滴滴濯腑胃擇侯須擇
賢無乃拔其彙帝城人欲入競進去乃貴誰無螻蟻心
早去亦有味朝家急賢秋人物欠經緯想當分符時欲
遣意猶未幸無疾其驅有詔儻可登

送呂子約赴天臺倅

癸丑
冬

少讀麗澤書投老未盡識譬如涉大海渺不見其極去

之若有失從之了無得約兄自西來為我倒胸臆始知
公輸巧要不外繩墨從茲往來頻不辨主與客去住寧
有定長恐使南北誰題治中與別日忽相偏欲留留不
可把袂三歎息送君浙河西狂濤立如植君其穩駕浪
我亦理行幅斯意莽無窮所願各努力

送何同叔赴湖南漕

癸丑夏

疇昔登賢書夫子持文衡每見輒忽別問端不能更一
從齒周行後先佐司成未幾奉辟書復接臺中評詞色

陶春和風味浥秋清人生事好乖歲晚意始傾云何千里去一節湘中行留行我無說脫去公方榮人言轉輪重我視錙銖輕望之拾遺願公豈少此情向來否泰疏上亦知忠誠公身有內外公意無虧盈鴈來書可慰細數新豐程

送范文叔知彭州

癸丑冬

吾友范文叔家世岷峨州忠純自性分耿耿明月秋竭來聲利場況與造物侔汲引如不及不進不肯休酸鹹

性難齊委曲能調柔一朝善類合人亦多君謀或者以
已量謂君相比周在我亦何感太空雲自浮俄然動歸
興瞥去輕于鷗始知進退間君子得自由聖主羅衆俊
巖空窮冥搜何以斗太州著我第一流無人子思側殷
勤為王留謬當豹尾間對此誠包羞五馬豈不貴吾非
為君籌君儻知我心毋忘天下憂

別周侍郎五首

東家十畝橘治蠹苛于獄課童事剔決生意長不足不

如西家農未麥土已熟一朝種子落坐見天地綠
人便適性事醫乃逢其癘有藥不投疾但欲甘于飴安
知萬全方非取頰舌宜誰能味此苦恐厭功效遲

太和到處萌物各從所受老農嘉穀心自覺稊稗醜道
旁有荊棘斤斧不得宥移根著山阿吾亦付薪樵

鵲有護巢心鴉負奪巢力紛爭互勝敗卒乃覆其室魯
雞本非鵲伏穀出羽翼我無拒爾心萬物同一息

創平痛方定醉甚忽解醒乃作翻然思遽能免心驚君

子足遠慮小人無隱情有言儻可吐守口何如瓶

讀書吟示鉉

吾聞讀書人惜氣勝惜金累累如貫珠其聲和且平忽然底復昂似絕反可聽有時靜以默想見紬繹深心潛與理會不覺詠歎淫昨夕汝讀書厲響驚四鄰方其氣盛時聲能亂狂霖倏忽氣已竭口亦遂絕吟體疲神自昏思慮那得清安能更雋永溫故而知新永歌詩有味三復意轉精勉汝諷誦餘且學思深湛

土缶

土缶寡譏誚白壁多瑕疵毀譽未心公名起謗亦隨天
下有真是不在愛惡時青青荊棘場拍拍蝴蝶飛不如
歲且寒更試松栢姿

臨江郡齋邀涼亭分韻得居字

子猷猶愛竹愛竹意已疎著腳踏危機肉相元未除要
識竹情性顧我求其初是中儻虛明處處我與居公侯
胸中竹不受富貴鋤平生對此君意足不願餘炎天憩

斯亭洒洒涼風諸涼風不可招招得還躊躇悠然忽相
會我適還似渠明朝有公事此意當何如

輓張南軒先生八首

妖氛動寥廓白日漫沙塵忠義不可沒扶攜憫如邠人
情易勇怯鼓舞吾當伸忽忘天地儼卻見玉帛鄰淪胥
五十年銳氣日以堙皇皇忠獻家正議摩秋旻隻手提
三綱一縷挽萬鈞狂敵不足滅頽俗何由仁千載諸葛
公相望吾霑巾

世無鄒孟氏聖道危于絲學者迷統緒擾擾徒外馳況
有釋老輩竊窺如鬼魅苦彼疑似說陷我高明資偉然
周與程振手而一麾源流雖未遠淆濁亦已隨公如一
陽復寒烈已可知斯文續以傳歲晚非公誰傷哉後來
者此世亡此師

邪正不兩立何異蕕與薰寧懷愛憎念趣尚難同羣向
來閭閻疎杯水沃烈焚雖無模滅期固亦摧炎熏黃鍾
動孤管衆樂知有君祇今才數年蒼蔚朝濟雲公身雖

已殞公言猶可聞所期動九天從此涇渭分寧願如曲江一尊酌孤墳

時平有贖賊人顆無寬鄉上下日逼趣彫瘵誰得將紛紛幾守宰所較有短長專利計錙銖治法出一方惟公作州牧萬物驚初陽仁心所發施四達無門旁丁庸省嚴瀨鹽筴寬南荒直惟此方人歲時悲奉嘗凡公不到處今恨無棠

吳楚尚機鬼習俗久已尤淫詞張鬱氣馳走如奔瀧春

秋巖報祈夜鼓紛逢逢娛神雜羽翾醺酒堆甕缸間用
次睢社千金博奇庵公能揭正理開此一世憇寧闕祠
有無廬屋記崢嶸要令冥行人從茲得明釭

平生中興念渴飲而饑食落落不可合令人氣填臆歸
來牧桂州才人用轉窄撫摩日多暇整整戎事飭偏伍
聯浮游坐作親部勒異時了劇寇乃比諸校力論兵較
利鈍夫豈謂深識牛刀何施宜功乃在鷄肋誰知我公
心投淚三歎息

拱壁墮泥塗康瓠置壇墀天心與人事頗似好乖舛賢
愚真是非每向死生辨哀榮若相迕遺恨常不免前年
建安公罹此二氣沴今年公復死殞我一世善龍文百
斛鼎功在白玉鉉斯人太薄命長苦樂事鮮時因思賢
憂終夕長展轉

昔年清江上再拜投漫刺忽忽僅班荆春風滿懷袂自
此成契濶書剗剖疑義此理有會通萬徹而一致縷縷
為我言顛倒行間字濯手時一觀如烹大鼎載嘆我無

持操莫勵四方志
君子不再見已負終身愧
從今一杯月永墮湘中淚

止堂集卷十六

欽定四庫全書

止堂集卷十七

宋 彭龜年 撰

七言古詩

登上封半山而霧大起歎而有作

憶昨雨霽投招提五峯幻出如新沐僧言一月無此奇
正直由公感通速傾曦已沒暝靄生竚立危亭看不足
遂扶晨策陵嶇嶇要識祝融真面目輕陰閣雨日將升

淺霧歎雲生半腹晦明變化在俄頃山鬼無端太翻覆
東西南北杳不知天柱諸峯固難矚因思世事無不然
氛垢時多少清淑良辰一遇信可欣濁世相遭匪予辱
湘纍為此賦遠遊要待棋終看結局嗟我寧能待汝清
原隰征夫駕方趣安得韓公劍倚天決斷浮雲取新旭
送趙使君老父吟

使君朝天騎霜蹄朔風獵獵吹裳衣鉦鐃聒天山谷應
旌旂弄日龍蛇飛邦人遮留留不得壯兒截鎗小兒泣

老翁數十相扶攜喘若筒吹行轉疾且行且止相歎嗟
若怨若慕言紛拏一翁指我門前土向時蓁莽今桑麻
自言新年年九十舊使姓名多記憶從頭屈指細平章
清靜安寧今第一狡胥每欲挑民爭能令衽席生五兵
我公平易與民近智巧有盡苦難行里中少年號刀筆
曾向公庭覘消息歸來語我使君明胸中是非紙上律
吾農疾苦年來多公今歸去誰撫摩留公無計可奈何
呼兒起舞舞吾當歌官家神聖似堯禹蠖濩宮深有言路

借留誰格向來書猶有民謠能取否或聞朝廷虛柄臣
須公經濟難逡巡延英奏對刻易下囊封且說江南貧
送王仲顯赴瓊州

朔風獵獵搜離思千山木葉飛東西山聲互答轟鼓聲
日影倒亂摩旌旗瓊山太守行赤帷父老出餞相扶攜
把袂惜別車去遲仙都散吏挈榼隨洗醕酌酒歌別離
別離之歌歌聲希兒女子態不願為聖皇擇守先南陸
朱崖况復環生黎黎山插天海四圍黎人出沒如鬼臚

兇鯨納集不可羈無異生縛虎與羆乃令錯處海一涯
一日萬變藏幾微趙張縮手龔黃癡良二千石非公誰
公行南方易如歸公舉南事易如攜向來鹽莢一局棋
白黑紛亂楊朱岐公能辨晰是與非袖有長疏天下知
口不可惜人可悲鬼魑虎羆日夜伺此時此事分安危
想公再拜辭玉墀睿意懇惻亦在茲九重寄公萬里師
紛紛獄訟不足治從駟遽聽東南馳定知召節封金泥
不然鹽莢更疇咨服嶺以南公一夔與公離別歌此詞

愧不以頌而以規

病足歌

馬有足疲馳驅牛有足勞畚菑不如大闔無更好終日兀坐如黏竊人言猶有深意存螭蛇無足終能飛此心儻欲與日競莫道有足無亦病

送曾無瑕改常州

夫君愛民如愛己不愛公卿愛刺史得州如斗喜不禁拍手催兒治行李朝家急賢不惜官日日中書有除旨

周南留滯太史歎目斷子公書一紙夫君却不薄淮陽
此見寧輸三十里庖丁雖欲善刀去無奈世間多巨髀
晉陵繁夥視三輔歷徧屏風無可使未央對罷天一笑
今日無憂惠山水未容遠去引自近早晚賜環差易耳
九華卻恐怨君王誤我明年花柳喜

次韵教授兄友惠柑

泮宮老潘賢且仁分義濃如手足親懸知故人在千里
健步遠來緘墨新黃柑霜後愈精好香味宛如包貢珍

分賞且用滌煩渴不救萊蕪炊甑塵

送任守赴邕管

吾聞廣南東西四十州諸蠻錯處如虵蜂東州之蠻富
珠貝西州有馬供羣騶一從隴右失芻牧萬里山蹊來
作足部分驛使視行殿路遠疲農輸食粟邊頭給估不
敢慳內地供億那得閒匹馬中人五家產歲入不足充
軍頒天子擇侯嚴五管橫山之雄視方面大賢不合著
炎方一馬直應勞遠算往時此地驚智高四海倣擾如

抑搔要荒易動古所畏況復立制爭錐刀年來馬質亂
三物廊廟謀深匹夫忽達官喜事失拊循機矢銛矛變
倉猝遠利安蠻福及人公行公行南中春一篇駟頌誰
能寫足用愛民功到馬

五言律詩

別袁州司戶司馬行二首

四海司馬氏大州從事賢
刺裁無劇務抑鬱已三年
人在甘棠裏夢回春草邊
知音有當路何日踐英躔

一見已草草那堪更別離事當防快意學亦進潛思此
道今誰語如公豈我私何時一牕下重與論心期

送牛守赴藤州二首

五馬南中去脩途一月寬暮年憂國切今日愛民難志
大人無小政平人自安端能掃蠻瘴莫作偶然看

半世幾契濶今年又別離我應嗟去遠人已恨來遲宿
草青無限野花紅欲窺藩車行有詔山路且逶迤

送梁憲易節漕二首

雨露收江上星辰下益州有賢容在外為國豈無謀德
音頻將遠君心頓減憂不然那有此定自啟金甌

峽口大江急劍門天下奇不因逢使節安得入公詩萬
里輕來去一心無險夷可憐門下士猶惜別離私

寄黃商伯兼簡詹元善

今日蠻荒好逢人說桂林祗應一片雲端在兩公心祈
望羅明月生黎斲水沈滔滔迷所往莫望指南針

挽益陽縣丞趙參議

一種銀潢秀清名仰太虛甲科嘗擢第午夜尚觀書已
覺身非我那堪丞負余斯人無復見掩涕一歎歔

挽熊仲賢監酒二首

歎息熊公子胸中亦自奇典衣緣客至沽酒趁花期滿
眼皆知已平生卻數奇一官終未試回首不堪思

舉世嗟浮薄誰堪寄死生空餘交友恨不見急難情我
昔為遊子公方作遠征那知成永訣灑淚閉佳城

挽楊邦寧

心事誰能識交遊得細論有居多水竹此世老丘園遺
恨成千古無人作九原晚來風政惡不忍賦招魂

挽歐陽幼立

行輩多名宦鄉閭愛老身成名了無恨韋布卻為榮久
矣追談笑居然隔死生朔風搜宇宙何日閉佳城

挽朱彥博二首

重惜夫君去哀吟思不窮江淮經畫裏風雨笑談中志
大長違俗才高無近功蓋棺公論出誰不羨英雄

對語牕飛雪橫舟月在灘西湖今會少里社此盟寒諸
子齒猶稚慈堂寢未安俱成無盡恨一見一辛酸

挽沈漕宜之父主管

蟬蛻軒裳早冰融義理深但知捐世累誰復識公心宇
宙終埋玉哀榮有賜金遙憐九原上烟雨暗寒林

挽尤尚書二首

太史病已革君王意尚疑欲為宣室召深動畫堂思共
起云亡歎空嗟大用遲九原如可作願賦百身詩

天子青宮友清時法從賢典型諸老舊人物中興前鎖
闥堆黃紙金華疊細旃奪公何太速誰與問蒼天

挽虞夫人

欲說夫人事誰能與世論諸郎名節立千古婦言尊共
此傷心日懷哉錫類恩佳城何處是烟雨政黃昏

挽丞相相四首

憶昨隨南史常窺侍帝垣負牆須密命垂涕進忠言懇
懇精誠到巍巍廟社尊至今天下誦功業在調元

慨惜三朝老忠勤一代師冕裳親奉日鼎鼐手調時揖遜承三節安危繫一辭世平今似水卻歎哲人萎

三絕今非少元功人未知豈云公有憾時恐世傳疑誰解吟成史寧憂罪到詩詩成終自愧空恨一年遲

疇昔危疑日嘗為根本謀不緣公一語誰識我深憂分閫因重見忘言只對愁無窮千古意有淚付東流

代張京尹賀皇太子生辰三首

問寢隨天子論經有帝孫千年幾神聖四世一乾坤盛

德從心遠靈源自古存欲知天意近九月似春溫

神光開甲觀寰海作重陽世盡占人瑞天應發子祥山
河涵玉露象緯瀉銀潢有道如三代寧須不老方

青禁羅雞戟朱明出虎闌布宣當浩穰簡樂著精微有
志窺成畫無材守一圻徒能歌聖子重潤更重暉

七言律詩

奉和御賜進士詩

昭回雲漢揭天章忽到人間足寵光必有颺言興率作

不須擊筑歎飛揚
湛恩汪濊傾多士
密意綢繆際萬方
何幸小臣陪俊造
一如豐草在成康

和袁州張守鹿鳴宴韻

太守興賢極選掄
奏書飛上帝王闕
幾年霧隱南山豹
今日風搏北海鯤
得士不孤天子詔
贈行仍有古人言
向來勸駕應無此
且喜成周禮樂存

和臨江庚子鹿鳴宴詩韻

風流蘊藉足儀型
小屈旌旗鎮列城
筆下雄深過班馬

胸中灑落似張程載賡宵雅推多士寧許皇芻繼大聲
間說河南詩有序從今亦有口傳名

和李東老韻

胸中塵慮厭多多彊把詩書細刮摩幸有長官憐拜起
苦無公事礙吟哦自慚俗駕爭相逐不識高軒肯見過
天濶鴈寒人又遠一盃相屬意如何
是日迎一兵鈴不
知東老見過既歸
乃迎見之可謂失所
先後矣慚慚慚

和臨江丙午鹿鳴宴詩韻

暖日輕霜作小春
冥冥鴻鴈正來賓
異時大比興賢禮
今日元侯勸駕身
西漢循良知賈誼
菑川父老送平津
眼中俱是青雲客
著我空慚跡已陳

挽無為軍王守

再分符竹向淮濱
只得除書下帝闕
不見使車隨邸吏
忽傳鳴馬感都門
豐碑未盡平生恨
哀些誰招天末魂
木落山空風獵獵
不堪俛首奠黃昏

挽傅德芳主簿

亭亭梁木遽然傾
吾里諸生失典型
已向東維次箕宿
定知南斗厭文星
書盈故篋墨猶濕
影掛虛堂燈自青
忍聽咿鳴哀挽罷
一川東去杳冥冥

鄂渚和章同年元滎鄧教授友龍微字韵

愚魯何妨與俗違
夷途方始識心歸
源源自是淵泉出

泉泉寧關庭燎輝

章以道術見示因語以學須先理會
大本章一言而契遂以詩相遺故云

莫向天涯尋墨客
須知海內有公非
謂子一杯何得如

前日竹杖芒鞋語翠微

再和

世情如水與天違誰識春從嶽麓歸
袞袞源流知有自紛紛華鄂看相輝
今人得似古時少我拙鄧號拙齋故云從教俗子非
且倒一樽尋樂事奇章臺上晚風微

挽陳迪功

一念超然與世違新蔬翦雨自甘肥
只因墮鴈能忘味不使驚鷗尚見機
有子明經那不壽如公積善未應非
從教天定知何似果見賢孫擢第歸

慶元戊午臨江勸駕多士凡由進士科進者皆預
焉且沿鄉人飲酒之意叙坐以齒酒半使君又出
傑句寵其行某陳人也偶覩盛事思有以記之敬
嗣嚴韻二首極愧不工尚幾鐫削

太守興賢隘九州勸為之駕盛炎劉方今神聖四門闢
即日英雄一網收在藻久觀鱣發發食苹又聽鹿呦呦
來年候對春風仗企首同趨曉月浮

黨里情疎孰繼周義年僅署竹冠劉燕毛不見三王盛

古意驚從一日收已許陳人觀易易再賡宵雅詠呦呦
試將旅語從頭記七字應無一字浮

重九

露下風高足感傷天君著意寫重陽建安能賦推諸子
楚國悲秋又九章我為催租閣詩思誰能送酒沃愁腸
黃花不解知人意開遍籬根數百行

病中招孫醫士

鑿鑿纔動熱蒸蒸直到更初漸漸清臟腑始堅今反利

痰涎愈盛氣難平形容凋瘦真如鬼耳目聰明粗似人
自是虛勞無可說更將經絡為推明

止堂集卷十七

欽定四庫全書

止堂集卷十八

宋 彭龜年 撰

五言絕句

邀涼亭五首

并序

庚子夏知府史公薤荒植竹因竹為亭氣象森
爽可以濯熱乃以柳柳州詩扁曰邀涼一日攜
客落之倡以新詩分韻屬賦某既著語詠此風

竹矣自恨為韻所闕思不能暢輒以樹竹邀涼
颺為韻再成五絕上呈然營度辛苦竟亦不能
奇也辱琢削為幸

勁節不可拘淨色不受污平生今日交屹屹老桂樹
史君大雅資胸中淡無欲尤物能移人猶有此數竹
涼風不肯來偃蹇如相要悠悠天地間捨我從誰邀
未必柳柳州有此一餉涼心清境自靜內躁物亦彊
簿書本不俗安能礙涼颺少陵冰壑心卻恨與事違

上帥漕閔雨十首

天子治平切一賢遠王畿朝廷豈不重赤子貧無依
九雨當一晴燥濕未應革那知平疇間已作龜兆坼
一冤旱三年此理乃無欺乖和自相召天意容何私
文移急征輸追逮及圭撮安得語里胥反手逐旱魃
豪家低昂心常對時虧盈卓氏一窖粟殺人眠長平
白粳十萬艘日夜隨東流常平貫雖朽還作蘇民不
飢民日磬磬洶洶潰堤水痛決未可知無易此一蟻

羸然一老翁一病一傷和寒暑不可測奈此根本何
天時不可齊天心不可違君子能知天手轉豐凶機
德意徧巖谷純心對雲天辨此一爇香從公作豐年

送趙介之赴春陵十首

訪舊知俗非好書與理近氣味既如此況復少畦畛
少年擢兩科才氣掄公行恨無東坡翁為君賦秋陽
百里不足騁千里漫同流推君友于心對此良優優
君知作縣易我知作縣難臨深以思險願勿作易觀

賦拙君能傳政拙君當繼為問舂陵人巧者竟誰似
嘗聞居士語丁寧有深旨要使眼高人不識貴公子
忍酒非上策忍醉乃真方長憶醒時悔須減醉時狂
齟齬不足病快意或為妖尤物亦移人此念當永消
一老不忍別相期尚百年正當愛日時賸種北堂萱
嫣然亭上雨鑑止池邊月人隔九疑山何以慰愁絕

別徐商老奉祠歸清江五首

并序

甲寅之冬上命某守荊州某以公在幕府欲固

辭或曰法不可也既辭不獲命則僕從而西已
而公與某書曰已上祠請矣慚不可忍某到荆
兩月公祠命下即日揚舲而東中懷慘然敬賦
五絕以寫兄弟之情恨不工也目而斥之為幸
已甚

平生兄弟間聚少散亦多欲作對牀夢奈此往復何
法許公不許法不如公嚴公不為我留寧避世俗嫌
我歸不能休公去不可挽依依原隰間相對意無限

嘗覘金匱書遺逸窮冥搜肯令太史氏挽作周南留
離離鴻鴈行漠漠鱸蓴秋誰獨無此情何以寫我憂

和王弱翁七首

不作畫梁燕定非幽谷鶯此心無著物萬事莫留名
貓頭爭立玉黃雀賸披緜橘子生猶綠江南十月天
漏思餘草木苛斂察箕頭猶有形骸礙誰為根本憂
濃淡雲山色抑揚風水聲體中有佳處不是喜雙清
曉日開屏障籃輿行畫圖融融萬物表此處是規模

霜螯百鎰重人世一身多我意已淒慘如君風味何
地熟桑麻易村深氣象醇此行真不惡今日似陽春

燕居十六首

事以義為本尤須禮作輿有時當致曲切勿背吾初
多貪緣縱欲多欲必傷生來日應難料空留不善名
酒盡或容求恩傷不可收偉哉王相國沈默孰與侔
荆棘不須裁須容駟馬來面前如路窄何地不高萊
迂轡不難為長愁與我違忍貧勝忍辱免被好人嗤

好語噤難出。卑詞強應酬。只云逃口禍。卻恐遂成偷。
事事皆由命。窮通各有時。窮通吾順處。雖命亦何為。
競索駕高車。吾寧守戶樞。安能念榮悴。且欲辨賢愚。
宿怨養癰疽。終須殞此軀。若能忘物我。天下盡平衡。
為利較鎗銖。真成小丈夫。脂肥不滿腹。罪已塞堪輿。
七情隨物感。惟怒最難平。我若能忘物。如雷動太清。
我身何自有。毫髮自親來。身且非吾物。何論身外財。
好毀非佳士。毋輕聽彼言。如人名父母。急去不須聞。

物害須當去無為煦煦仁可憐永某氏愛鼠卻傷人
冬月不啟壁深慮驚蟄蟲物方全性命如我愛吾宮
捧檄為親喜拖紳豈我榮若謀妻與子寧不愧何平

七言絕句

和壽岡楊先生上丁四首

并序

郡有學祀夫子春秋釋奠禮也其品章存有司
然間有不舉者郡將施侯至此邦盡舉其遺始
製祭服乾道己丑八月上丁禮成鄉先生楊教

授作詩紀其事以寄教授張丈而未有紅裙之
句某不揆輒嗣韻奉呈且為張丈解嘲并以二
詩頌先生詞翰之美云

禮成繇絕固遐方揭此威儀日月光他日抗章論祀事
賢侯不減漢平當

書牕兀兀到斜曛羊腍烹來我亦欣莫訝廣文官獨冷
水光一抹當羅裙

未識平時活國方只將詩句閱風光盤空筆力今誰敵

獨埽千人不可當

竹暗橫牕日已曛我方酣寢學羊欣銀鈎鐵畫應無限
乞取先生一練裙

挽趙通判五首

絃歌到處即熙然桑柘青含淡淡烟肯倩奇花樹民怨
為人歲歲作春妍

春風千里下屏星荆棘叢中稻眼青凋瘵已肥身已瘠
丹砂還解此公靈

風波要自吾心定
涇渭從渠何日分
公已著身榮辱外
世間餘子自紛紛

向來三疊泣陽關
猶望歸來肯自寬
今日重過更席處
卻思人世別離難

霜風獵獵寒無奈
江水漫漫去莫留
欲訊音容無定在
松筠竦竦暮烟浮

和徐思叔謝向大夫惠柑四首

萱草堂中樂洵融
豪家異味可能重
政慙陸子懷無橘

錫類那知有頽封

滿滿風霜味正肥
厥包萬里逐雕題
封君莫羨傳柑寵
清爽何如植與梨

作詩渾似譚經戴
奪盡從頭席幾重
文本一經題品後
虛名不數大夫封

養生未得仙人術
治病徒尋藥裏題
安得從公橘中隱
細論火棗與交梨

和安成彭清老五首

山有喬松隰有臺胸中日月太平開安車不入申公念
祇恐詔從天上來

閉戶長吟何水曹人間富貴九牛毛博山一縷清香永
餘子不知更幾刀

鏗鏘金石三千首吐納雲烟四十年自有山神回俗駕
不愁大尹觸吟鞭

里中諸老皆公識破戒相過問故人顧我那能來重客
知公不薄少年新

公餘几上詩書亂事簡庭中鴈鶩休乞我新篇洗凡俗
蕭蕭風雨打牕秋

送吉州詹守五首

平生兩耳熟龔黃今日身親識大方太史若徵循吏傳
一篇氣脈在耕桑

諫垣禮樂三千疏牕下詩書六十年莫訝勾吳留不住
解隨膏雨到江邊

骨鯁嘉言憶舊臣故應赴詔近嚴宸席前若下清明問

且說江南一味貧

烏龍山下曉風輕
白鷺洲前暮靄凝
今日可能如昨日
廬陵還解似嚴陵

柏移平地失崎嶇
培壅恩深報一無
惟有依歸意難盡
不堪澼澼水循渠

勸輸租

田氓輸課稍逡巡
排日呼來不厭頻
認取私家催米意
莫憎門外督租人

送鄭尚書守建安十首

自從秉節邁明廷
讜論忠言四海傾
何事不關天下念
此心無著世間名

親奉王明御六龍
合登宰路冠諸公
未應天子青宮友
猶滯黃幡豹尾中

聞上金華勸講班
啟心長是片言間
一從元祐諸公後
得此淵源自玉山

春來苦雪夏來寒
南去愁霖北去乾
又報豐年無一事

乞身遠去可能安

一賢去國四方嗔卻恐猜疑到玉宸
急把丐聞書報下此行猶足律貧人

直節亭亭屹不流沖然襟度更休休
世間多少難平事可惜先生不少留

東西一節大江邊來往勤民亦有年
未必米鹽勞試守更從根本得深研

從此褰帷去帝鄉閭閻辛苦足平章
阜隲若有新豐奏

纔過龍團第一綱

革履如今遠帝廬
眼前憂念總區區
黃鐘一氣元來在
安得先生起亞夫

好風佳月滿襟懷
嘗到先生文室來
今日忽為江海別
此心肯逐晚潮回

和張憲吳園山居二首

輕辭綠野逐征夫
踏遍溪山總不如
莫愛畫圖嘗在眼
渠儂還亦愛吾廬

參天喬木鎮山川栽種成陰知幾年仰止名園今老矣
卷舒畫軸思悠然

和向大夫坐韻

并序

致政大夫向公致政先生楊公同甲子也而先生之辰先焉一日訪表兄徐思叔大夫公欲坐先生下不可又一日大夫公有詩堅此約時侍席者爭傳以為此邦一段佳事皆屬和雖然大夫公豈以是為佳哉輒次嚴韻道此意

欽定四庫全書

止堂集
卷十八

道義交情不用盟鳴謙肯作震雷驚論功平勃非吾事
付與人間仔細評

謝劉大權為壽

涼月紛紛弄綵衣桑弧蓬矢拂庭闈不因妙語從君得
何事茅簷星斗稀

壽張京尹十首

岷山斗險介巴江天地精神此晦藏已發峨眉清一段
公家父子又相望

盡心堂上得心傳妙處機緘共一天玉骨冰姿更相似
黑頭只欠著貂蟬

四百山河朝帝京紫巖有志未全伸知公久抱中原略
日日搜羅度外人

納湖千頃自源流淡淡春風百尺樓盡出詩書到功業
只今天下矚君侯

天府何為屈我公謾將煩處壓才雄若兼二輔亦可了
萬化斡旋猶有功

彈壓殊非翼翼商藉公惠養破天荒從今若說亨者正
不數前張數後張

湖面撥開雙眼翳湖頭拔立一堤金先生能事真如此
捍滌羣邪即此心

翁兒一笑大歡足雞犬不驚仁意多欲得使君真實諦
直須堂外識中和

鰕生何幸倚門牆千里崎嶇入帝鄉贏得菊花醵壽酒
今年又近一重陽

欲頌公侯學魯人怕衝大尹罷長吟亦知已有長生訣
四益齋中四益箴

為張氏題秀盤閣

扶輿磅礴滿清虛未必山川獨有餘欲識秀盤無盡處
吟風弄月得吾初

王文伯將校藝漕闡過我取別肯作一夕飲酒竟
猶子留之西齋厥明文伯有詩敬賡原韻

已聞鼓篋無秦銳肯為論文學賈留奪我清風俄頃爾

夢回真若隔三秋

劉宗元索余賦愚谷古人以愚自命及命人者多
矣余不暇辨姑以二絕言愚之理云

以愚名谷意何如肯以愚溪認作吾天地中間有真我
蕭然陋巷不關渠

命谷為愚谷曰愚人心難似谷心虛夫君若踏歸愚路
坐斷人間毀與譽

送徐仲洪尉南安八首

并序

開禧乙丑十一月朔旦表姪徐仲洪作尉南安
以西園伯氏藥石之辭要余贈言顧余疲忝如
此安得佳思要不可已亦以八絕塞命然伯氏
之言君臣品也如鄙語真佐使輩耳若以泄其
太過濟所不及或庶幾焉

仲洪作尉南安縣示我西園藥石辭莫道近民民易擾
官清民近更相宜

聖朝寬令捷驚霆尉不留心竟不行萬事閭端皆在我

安危便可到蒼生

催科莫作擾人看
趁此登場早了官
坐視貪殘敗吾子
不如自放一分寬

若見村中小校師
教將義理訓童兒
四端五品人人有
莫道冥頑不與知

椎牛酌酒是民頑
明約科條墟里間
若更寬他衣食路
桑間陌上自閑閑

血氣誰無未免爭
腰牛公牘角蝸情
半非半是先須識

但要吾心似水平

作尉之難似胥尸一生一死總吾為是心倘有分毫歉
脫手翻車悔莫追

手弓皆是虎狼才巡徼寧無去復來倏去倏來無滯迹
蝗螟雖過不為災



止堂集卷十八